



Nach erholsame und heisse Summerferie, sind mir wieder mit neuer Energie und viele tolle Idee zrugg im Jugendzentrum acho. Mir freued eus ufs neue Schueljahr, uf neu und altbekannti Gsichter, neu Gschichte und tolli Ziite.



I de Summerferie hend mir es Ferienprogramm abote, mir hend unter anderem de Unterstand ufem Usseareal renoviert, Tisch und Bänk abschliffe, neu lackiert und alles putzt. Jetzt strahlt de Unterstand in neuem Glanz und wird vo de Jugendliche intensiv gnutzt. Da d Summerferie tür sind, hend mir ide Ferie Sackgeldjobs abote, wo vo de Jugendliche dankend agno wurde sind.



OPENHOUSE

Im Openhouse sind am Mittwoch wie au am Fritig vill Jugendliche im Treff und d Stimmig isch usglaesse. De neu Billardtisch wird gern gnutzt. Im Schnitt zähle mir sit de Summerferie ca. 20 - 30 Jugendliche während eusem Open House Ahgebot.

TREFF OTTEBACH

De Mittelstufetreff in Ottebach wird stark bsuecht und d'Kids gnüssed s'Ahgebot. Es wird vill Billard, Playstation und Fangis gspilt. D'Stimmig isch Energieglade und guet. d'Kids sind liecht z'motiviere und bringed tolle Idee.

UFSUECHENDI

Bim Ufsueche isches im Verhältnis zum Treff eher ruhig, wenig Kontakt doch defür spannendi Diskussione und interessanti Gspröch mit de Jugendliche wo unterwegs sind. Somit steht Qualität über de Quantität und mengisch mues mer sich chli in Geduld üebe, dra blibe und kontinuierlich unterwegs si.



RAP, GRAFFITI UND ALLES WAS MIT KUNST ZTUE HÄT

TONSTUDIO BLACK DIAMONDS

Sit de Summerferie isch Rap bi de Jugendliche no es viel grössers Thema wurde wie vorher. Einigi sind Intensiv im Tonstudio ihri Skills am Mikrofon am verbessere und werdet immer besser im bediene vom Musikprogramm ufem PC. Wenns Studio mal ned verfüegbar isch, chas au si, dass es spontan es Rap-Battle ufem Usseareal git. Eus freut die Entwicklig und das s'Tonstudio wieder meh gnutzt wird.

EXPO OBFELDE

Eusi grossi Ussewand isch ade Expo vo rund 40 Chinder und Jugendliche besprayed wurde, s'Endergebnis isch farbig und lebendig. Isch immer wieder schön z'gseh wie vill sich für Kunst und vorallem au s'Graffiti chönd begeistere. Isch en super Stimmig gsi und en volle Erfolg. Dank de tolle Zämearbeit vom Kulturverein Obfelde, em Künstlerkollektiv vo ArtGrid und em O2JUGEND het das chöne realisiert und duregfüehrt werde.

LEGAL WALL O2

Vor ca. 5 Mönent hend mir eusi chlineri Spraywand g'öffnet und Jugendliche wo hend wolle Spraye, d'Möglichkeit geh mit ere O2-Bewilligung die Wand Autonom z'bemale und z'nutze. Es isch us ere Idee entstande und het sich bewährt. Die Jugendliche nutzt s'Ahgebot und gnüsseds, dass si en legali Wand hend wo si chönd Üebe und ihri Graffitiskills verbessere.

GRAFFITIPROJEKT 8913

Am Mittwuchnamitag hemer mit 14 Jugendliche zwüsched 10 und 12 Jahr en Graffiti Workshop gmacht, wo si ihri eigeni Platte hend chöne bespraye! Die Platte werdet im Jugendtreff in Ottebach ufghängt. S'Wetter isch perfekt gis, d'Kids hend Spass gha, guet mitgmacht und hend super Bilder gschaffe! D'Rückmeldige vo de Kids und de Eltere sind sehr positiv gsi und deshalb werde mir in absehbarer Zit vermehrt Graffitiangebot fürd Mittelstufe mache.





VILL PROJEKT UND AKTIONE

Mir sind voller neu geschöpfter Energie und möchte eusi Agebot stetig usbaue und verbessere. Drum hend mir e huufä neu und altbewährti Projekt in Ussicht. Euses Herbstferie-Programm wird legendär, mit Lasertag, Burgäfölk ide Turnhalle, en Studiotag wo ihr euche eigeni Song chönd ufneh und en Kinoabig passend zum Herbstwetter. Lueged i eusem Monatsprogramm, es lohnt sich! Sunday- Sports wird au wieder duregfüehrt und startet am 23. Oktober und lauft bis endi Februar 2023.

Zuesätzlich chömed stetig neu Projekt dezue, wie de Graffitiday oder euses Bubblesoccer Turnier!

Die Projekt sind vo Jugendliche is Lebe grueffe wurde und gmeinsam mit de Jugendliche Planed und Organisiert wurde.

INFOS ZU ANGEBOTEN:

www.o2jugend.ch

info@o2jugend.ch

Instagram: o2jugend

